

দেবী

সে আজ কিঞ্চিদধিক একশত বৎসরের কথা ।

পোষ্যমাসের দীর্ঘ রজনী আর কিছুতেই পোহাইতে চাহে না ।
উমাপ্রসাদের নিদ্রাভঙ্গ হইল । লেপের ভিতর অনুসন্ধান করিল,
স্ত্রী নাই । বিছানা হাতড়াইয়া দেখিল তাহার ষোড়শী পত্নী এক
পাশে গুটিগুটি হইয়া পড়িয়া ঘুমাইতেছে । সরিয়া গিয়া অতি
সম্ভর্পণে তাহার গায়ে লেপখানি চাপাইয়া দিল । পাশে পায়ের
দিকে হাত দিয়া দেখিল কোথাও ফাঁক বহিতেছে কি না ।

উমাপ্রসাদ বিংশতিবর্ষীয় যুবক । সম্প্রতি সংস্কৃত ছাড়িয়া সখ
করিয়া পারশ্রভাষা শিক্ষা করিতে আরম্ভ করিয়াছে । মা নাই ;—
পিতা, পরম পণ্ডিত, পরম ধার্মিক, নিষ্ঠাবান শক্তি-উপাসক, গ্রামের
জমিদার, সন্মানের সীমা নাই । অনেকের বিশ্বাস, উমাপ্রসাদের
পিতা কালীকিঙ্কর রায় মহাশয় একজন প্রকৃত সিদ্ধ পুরুষ, আত্মশক্তির
নিশেষ অনুগৃহীত । গ্রামের আবালাবৃদ্ধ তাঁহাকে দেবতার মত প্রক্কা করে ।
* উমাপ্রসাদ আপনার নবীন জীবনে সম্প্রতি নবপ্রণয়ের মাদকতা
অমুভব করিতে আরম্ভ করিয়াছে । পাঁচ ছয় বৎসর পূর্বে তাহার
বিবাহ হইয়াছে বটে, কিন্তু পত্নীর সহিত ঘনিষ্ঠতার সূত্রপাত এই
নূতন । স্ত্রীর নাম দয়াময়ী ।

স্ত্রীর গাত্র আবৃত করিয়া উমাপ্রসাদ তাহার গণ্ডস্থলে একখানি
হাত রাখিল—দেখিল সে স্থান শীতে শীতল হইয়া গিয়াছে । অত্যন্ত
ধীরে ধীরে পত্নীর মুখচুম্বন করিল ।

যে রূপ নিয়মিত তালে দয়াময়ীর বিশ্বাস বহিতেছিল, সহসা তাহার
ব্যতিক্রম হইল । উমা জানিল স্ত্রী জাগিয়াছে । মৃদুস্বরে ডাকিল—“দয়্যা ।”

দয়্যা বলিল—“কি ?” “কি”টা খুব দীর্ঘ করিয়া বলিল ।

“তুমি বুঝি জেগে রয়েছ ?”

দয়াটোক গিলিয়া বলিল—“না য়ুমুচ্ছিলাম ।”

উমাপ্রসাদ আদর করিয়া স্ত্রীকে বুকের কাছে টানিয়া আনিল ।
বলিল—“যুমুচ্ছিলে ত উত্তর দিলে কে ?”

দয়া তখন আপনার ভুল বুঝিতে পারিয়া অপ্ৰতিভ হইল । বলিল
—“আগে যুমুচ্ছিলাম, এখন জেগে উঠলাম ।”

উমাপ্রসাদ জিজ্ঞাসা করিল—“এখন কখন ? ঠিক কোন্ সময় ?”
—উমা ভারি ছষ্ট ।

“কোন্ সময় আবার ?—সেই তখন !”

“কখন ?”

“যাও আমি জানিনে ।” বলিয়া দয়া স্বামীর বাহুপাশ হইতে
মুক্ত হইবার বৃথা চেষ্টা করিল ।

ঠিক কখন জাগিয়াছে, দয়াও কিছুতে বলিবে না, তাহার স্বামীও
কিছুতে ছাড়িবে না । কিয়ৎক্ষণ মান অভিমানের পর দয়ার পরাজয়
হইল । উত্তর দিল “সেই যখন তুমি”—বলিয়া থামিল ।

“আমি কি করলাম ?”

দয়া খুব তাড়াতাড়ি করিয়া বলিল—“সেই যখন তুমি আমার চুমু
খেলে ;—হল ! মাগো মা ! এত জান !”

তখনও এক প্রহরের অধিক রাত্রি আছে । দুজনে কত কথা
আরম্ভ হইল । অধিকাংশ কথাই না আছে মাথা না আছে মণ্ড ।
হায়, শত বৎসর পূর্বে আমাদের প্রাপিতামহগণের তরুণবয়স্ক পিতা
মাতাগণ, অসার অপদার্দ আমাদেরই মত “এমনি চঞ্চল মতি গতি”
ছিলেন । অত বড় শাক্ত পরিবারের সন্তান হইয়াও উমাপ্রসাদ সে
পর্যন্ত একদিনও স্ত্রীর নিকট মূদ্রাপ্রকরণ বা মাতৃকাষ্ঠাসের কোনও
প্রসঙ্গ উত্থাপন করে নাই এবং বমনিয়মাদি সম্বন্ধে তাহাকে সম্পূর্ণ অজ্ঞ
রাখিয়াছিল ।

নানা কথার পর উমাপ্রসাদ বলিল—“দেখ, আমি পশ্চিমে চাকরি
করতে বেরুব ।”

দয়া বলিল—“তোমার আবার চাকরি কেন ? তোমার কিসের
ছঃখু ? জমিদারের ছেলে হয়ে কেউ চাকরি করে না কি ?”

“আমার এখানে হুঃখু আছে বৈ কি।”

“কি?”

“তুমি যদি আমার হুঃখু বুঝবে তা হলে আর আমার হুঃখু কিসের!”

শুনিয়া দয়া ভারি অপ্রস্তুত হইয়া গেল। ভাবিতে লাগিল, কি হুঃখু? — ভাবিয়া কিছুই স্থির করিতে পারিল না। একটু ছুঁটামি বুদ্ধি আসিল। বলিল—“তোমার কি হুঃখু? আমি বুঝি মনের মত হইনি?” দয়া জানিত এ কথা বলিলে উমা-প্রসাদকে আঘাত করা হইবে।

উমা-প্রসাদ প্রিয়ামুখে অজস্র চুশনবর্ষণ করিয়া এই আদাতের প্রতিশোধ লইল। পরে বলিল—“আমার হুঃখু তোমাকে নিয়েই বটে। সমস্ত দিন আমি তোমায় পাইনে। শুধু রাত্তিরটি পেয়ে সাধ মেটে না। বিদেশে চাকরি করতে যাব, সেখানে তোমায় নিয়ে যাব, কেমন দুজনে একলা থাকব সারাদিন সারারাত।”

“চাকরি করবে ত সারাদিন আমাকে নিয়ে থাকবে কেমন করে? আমাকে ত একলা ফেলে তুমি কাজারি চলে যাবে।”

“কাছারি গিয়ে খুব শিগগির শিগগির ফিরে আসব!”

দয়া ভাবিয়া দেখিল, তা হইতে পারে বটে। কিন্তু বাধা বিপত্তি যে অনেক।

“তুমি ত নিয়ে যাবে, সবাই নেতে দেবে কেন?”

“এখান থেকে কি নিয়ে যাব? যখন শুনব তুমি বাপের বাড়ী গিয়েছ, তখন চুপি চুপি এসে তোমায় সঙ্গে করে নিয়ে যাব।”

শুনিয়া দয়া হাসিল। এও কি সম্ভব না কি?

“কতদিন আমরা থাকব সেখানে?”

“অনেক বছর থাকব।”

দয়া মুচকি মুচকি হাসিতেছিল, সহসা একটা কথা তার মনে পড়িয়া গেল। বলিল—“খোকাকে ফেলে কি অনেক বছর আমি বিদেশে থাকতে পারব?”

উমা-প্রসাদ স্ত্রীর গালে গাল রাখিয়া কাণের কাছে বলিল—“ততদিন তোমারও একটি খোকা হবে।” কথাটি শুনিয়া দয়ার গুণ্ঠপ্রাস্ত হইতে কর্ণমূল পর্য্যন্ত লজ্জায় রাগা হইয়া উঠিল। কিন্তু অন্ধকারে তাহা কেহ দেখিতে পাইল না।

উল্লিখিত খোকাটি উমাপ্রসাদের জ্যেষ্ঠ সহোদর তারাপ্রসাদের এক-
মাত্র সন্তান। স্বয়ং উমাপ্রসাদ এ বাটীর শেষ খোকা। এই পরিবারে
খোকা-রাজার সিংহাসন বহুকাল শূন্য ছিল, তাই খোকার বড় আদর ;
খোকা বাড়ীসুদ্ধ সকলের চক্ষের মণি। খোকার মা হরসুন্দরী,—তার
তঁ আর গরবে মাটিতে পা পড়ে না।

দয়া সহসা বলিল—“আজ এখনো খোকা এল না কেন?”

ভোর রাত্রে রোজ খোকা কাকীমার কাছে আসে। এটি
তার নিত্য নৈমিত্তিক কার্য। যদিও বাটীতে দাসদাসীর অভাব
নাই, তথাপি গৃহকার্যের অধিকাংশ দয়া স্বহস্তে করিত। বিশেষতঃ
তাহার খণ্ডরের পূজাত্মিক সম্পর্কীয় সাহা কিছু কাব্য তাহাতে
দয়া ছাড়া অপর কাহারও হস্তস্পর্শ করিবার অধিকার ছিল না।
সারাদিন এই সমস্ত কার্যে ব্যস্ত থাকিয়াও খোকাকে সে একমুহূর্তও
চক্ষের আড়াল করিত না। কাকীমা গা মুছাইয়া না দিলে খোকা
গা মুছে না, কাকীমা কাজল না পরাইয়া দিলে খোকা কাজল পরে না,
কাকীমার কোলে ভিন্ন অন্য কোথাও শুইয়া খোকা দুধ খায় না।
খোকার বিছানায় তার কাকীমা অনেক রাত্রি অবধি থাকিয়া ঘুম
পাড়াইয়া আসে,—ভোর রাত্রে ঘুম ভাঙিলেই খোকা ‘কাকীমা’
বলিয়া কান্না জুড়িয়া দেয়। এই প্রগল্ভতা, এই অন্ডায় আবদারের
জন্ত মধ্যে মধ্যে তাহাকে হরসুন্দরীর নিকট হইতে চড়টা চাপড়টা
পুরস্কার পাইতে হয়। কিন্তু বলাই বাহুল্য, তাহাতে কান্না না থামিয়া
আরও দশগুণ বাড়িয়া উঠে। তখন হরসুন্দরী তাহাকে কোলে
করিয়া, ক্রোধে ও নিদ্রাশোরে টলিতে টলিতে দয়ার শয়ন-
কক্ষের দ্বারে আসিয়া ডাকেন—“ছোট বউ, ও ছোট বউ, এই নে
তোয় খোকাকে।”—বলিয়া, দয়ার দুয়ার খুলিবার অপেক্ষা না
রাখিয়াই, খোকাকে মাটিতে বসাইয়া প্রস্থান করেন। দয়া প্রায়ই
জাগিয়া থাকে, না থাকিলেও খোকার ক্রন্দনে শীঘ্রই জাগিয়া উঠে,
ছুটিয়া আসিয়া খোকাকে বুকে করিয়া লইয়া যায়, “কে মেরেছে
কে মেরেছে” বলিয়া কত সোহাগ করে। মাথার শিয়রে পাণের
ডিবায় কোনও দিন কদমা, কোনও দিন বাতাসা, কোনও দিন

নারিকেলের নাড়ু সঞ্চিত থাকে, তাই খোকা ভক্ষণ করে, তাহার পর নিশ্চিন্ত হইয়া কাকীমার কোলে শুইয়া ঘুমাইয়া যায়। আজ এখনও খোকা আসিল না বলিয়া দয়া কিছু উৎকণ্ঠিত হইল। বলিল—
“বাছার অন্তঃস্থ বিষ্ণু করেনি ত?”

উমাপ্রসাদ বলিল—“বোধ হয় এখনও রাত্রি আছে। দেখি দাঁড়াও।”

উমাপ্রসাদ বিড়ানা হইতে উঠিয়া জানালা খুলিল। বাহিরে আম ও নারিকেল বৃক্ষ বহুল বাগান। তখনও চন্দ্রাস্ত হয় নাই,—কিন্তু অধিক বিলম্বও নাই। দয়া নিঃশব্দে আসিয়া স্বামীর পার্শ্বে দাঁড়াইল। বলিল—“রাত আর বেশী কই?”

শীতের হিমবায়ু ছুত করিয়া জানালা পথে প্রবেশ করিতে লাগিল। তবু ছুই জনে সেই অনালোকে পরস্পরের পানে চাহিয়া কতক্ষণ দাঁড়াইয়া রহিল। অনেকক্ষণ তাহাদের চক্ষু ধে উপবাসী ছিল।

দয়া বলিল—“দেখ, আজ আমার মনটা কেমন হয়ে গেছে। খোকা এখনও এল না। কি জানি, কেন মনটা এমন হয়ে গেল!”

উমাপ্রসাদ বলিল—“এখনও পোকায় আসবার সময় হয় নি। যে দিন ঘুমিয়ে পড়ে সে দিন ত আসতে দেবীও হয়। তোমার মন সে জন্মে খারাপ হয় নি। কেন হয়েছে আমি জানি।”

“কেন বল দেখি?”

“বলেছি কি না আমি পশ্চিমে যাব চাকরি করতে, তাই তোমার মন খারাপ হয়ে গেছে।”—বলিয়া উমাপ্রসাদ স্ত্রীকে নিজের আরও কাছে টানিয়া লইল।

দয়া একটি ছোট দীর্ঘনিশ্বাস ফেলিয়া বলিল—“আমি বুঝতে পারছি। মনে হচ্ছে যেন আর তোমার সঙ্গে দেখা হবে না।”

বাহিরে জ্যোৎস্না নিরন্তর শব্দে শ্রবণে। পত্নীর কথা শুনিয়া উমাপ্রসাদের মুখখানিও ম্লান হইয়া গেল।

অনেকক্ষণ ছুইজনে দাঁড়াইয়া রহিল। চাঁদ ডুবিয়া গেল। গাছপালা অন্ধকারে গা ঢাকা দিল। জানালা বন্ধ করিয়া উভয়ে শয্যা ফিরিয়া আসিল।

ক্রমে একটা আধটা পাখীর ডাক শোনা গেল। পরস্পরের বন্ধো-
নিবন্ধ হইয়া তাহারা ঘুমাইয়া পড়িল।

ক্রমে জানালার রন্ধপথে প্রভাতের আলোকরশ্মি প্রবেশ করিতে
লাগিল। তখনও ছই জনে নিদ্রাভিত্ত।

সহসা বাহির হইতে উমা প্রসাদের পিতা ডাকিলেন—“উমা।”

প্রথমে ঘুম ভাঙ্গিল দয়ার। সে গা ঠেলিয়া স্বামীকে জাগাইয়া দিল।

কালীকঙ্কর আবার ডাকিলেন—“উমা।” স্বরটা কল্পিত, যেন অগ্নি
রূপ, ইহা যে তাঁহারি কর্ণস্বর তাহা যেন কষ্টে বুঝা গেল।

এত ভোরে পিতা ত কখনও ডাকেন না। আর তাঁহার স্বরই বা
এমন হইল কেন?—তবে সত্য সত্যই পোকার কিছু অস্ব্থ বিস্ব্থ
করিয়াছে বুঝি! উমা প্রসাদ তাড়াতাড়ি উঠিয়া উয়ার পুলিয়া দিল।

দেখিল, পিতার পরিধানে রক্তবর্ণ কোষেয় বস্ত্র, স্বক্ষে নামাবলী
উত্তরীয়, গলে রুদ্রাক্ষমালা লম্বমান। এ কি! এত ভোরে তাঁহার পূজার
বেশ কেন? অগ্নি দিন গঙ্গান্নান করিয়া আসিয়া তবে তিনি পূজার বেশ
পরিধান করেন। যুর্ভকালের মধ্যে এই চিন্তাপরস্পরা উমা প্রসাদের
মস্তকে উদিত হইল।

দ্বার খুলিবারাত্র কালীকঙ্কর পুলকে ভিজ্জাসা করিলেন—“বাবা,
ছোটবউমা কোথায়?”

স্বর পূর্ববৎ কল্পিত। উমা প্রসাদ কঙ্কের চারিদিকে চাহিল। দয়া
শব্দাত্যাগ করিয়া উঠিয়া, কিছু দূরে জড়সড় হইয়া দাঁড়াইয়া ছিল।

কালীকঙ্করও সেই দিকে নেত্রপাত করিলেন। বধুকে দেখিতে
পাইবারাত্র, নিকটবর্তী হইয়া তাহার পদতলে সাষ্টাঙ্গ প্রণিপাত
করিলেন।

উমা প্রসাদ বিষয়ে বাক্যহীন। দয়াময়ী স্বপ্নের এট অদ্ভুতচরণ
দেখিয়া নিস্পন্দভাবে দাঁড়াইয়া রহিল।

প্রণামান্তে কালীকঙ্কর বলিলেন—“মা, আমার জন্ম সার্থক হল।
কিন্তু এত দিন কেন বলিসনি মা?”

উমা প্রসাদ বলিল—“বাবা—বাবা!”

কালীকঙ্কর বলিলেন—“বাবা, ইহাকে প্রণাম কর।”

উমা প্রসাদ বলিল, “বাবা—আপনি কি উন্মাদ হয়েছেন ?”

“উন্মাদ হইনি বাবা, এতদিন উন্মাদ ছিলাম বটে। আজ আরোগ্য-লাভ করেছি, সেও মার রূপায়।”

উমা প্রসাদ পিতার কথার কিছুই অর্থগ্রহণ করিতে পারিল না। বলিল—“বাবা, আপনি কি বলছেন ?”

কালীকিঙ্কর বলিলেন—“বাবা, আমার বড় সৌভাগ্য। যে কুলে জন্মেছি তা পবিত্র হল। বালাকালে কালীমন্ত্রে দীক্ষিত হয়েছি, এত দিন যে সাধনা, যে আরাধনা করলাম তা নিফল হয় নি। মা জগন্ময়ী রূপা করে ছোটবউমার মন্তিতে আমার গৃহে স্বয়ং অবতীর্ণ হয়েছেন। গত রজনীতে স্বপ্নযোগে আমি এই প্রত্যাদেশ পেয়েছি। আমার জীবন ধন্য হল।”

দয়াময়ী ছিল মানবী—সহসা দেবীত্বে অভিষিক্ত হইল।

পূর্বোক্ত ঘটনার পর তিন দিন অতিবাহিত হইয়াছে। এই দিবসত্রয়ে এ সংবাদ বহুদূর ব্যাপ্ত হইয়া গিয়াছে। আশে-পাশের বহু গ্রাম হইতে বহু জন আসিয়া প্রসিদ্ধ শাক্ত-জমিদার কালীকিঙ্কর রায়ের বাটীতে দয়াময়ী-রূপিণী আত্মশক্তিকে দর্শন করিয়া গিয়াছে।

দয়াময়ীর রীতিমত পূজা আরম্ভ হইয়াছে। ধূপ-দীপ জালিয়া, শঙ্খ-ঘণ্টা বাজাইয়া, ষোড়শোপচারে তাহার পূজা হয়। এ কয় দিনে দয়াময়ীর সম্মুখে বহুসংখ্যক ছাগবালি হইয়া গিয়াছে।

কিন্তু এ তিন দিন দেবতার পূজা পাইয়াও দয়াময়ী কেবল কাঁদিতেছে। তাহার নিদ্রা এক প্রকার ত্যাগ করিয়াছে বলিলেই হয়। এই আকস্মিক অদ্ভুত ঘটনায় তাহাকে এমন অভিভূত, বিপর্যস্ত করিয়া ফেলিয়াছে যে সে দুই দিন আগে এ বাটীর বধু ছিল, স্বপ্ন ও ভান্নরের সাক্ষাতে বাহির হইত না, এ সমস্তই বিস্মৃত হইয়াছে। এখন আর তাহার মুখে অবগুণ্ঠন নাই,—বাহার তাহার পানে শূন্য দৃষ্টিতে পাগলিনীর মত চাহিয়া থাকে। তাহার কণ্ঠস্বর অত্যন্ত মৃদুভাবাপন্ন হইয়াছে, রক্তবর্ণ চকু দুইটি কুলিয়াছে, বেশবাস স্তম্ভত নহে।

রাজি দ্বিপ্রহর। পূজার ঘরে একটি কোণে স্তুতদীপ মিটি মিটি করিয়া জলিতেছে। পুরু কবলের বিছানায় রেশমী বস্ত্রের আধরণ, তাহার উপর দয়াময়ী শয়ন করিয়া আছে। গায়ে একখানি মোটা শাল। ছয়ার বন্ধ ছিল মাত্র, অর্গলিত ছিল না। অত্যন্ত ধীরে ধীরে সে ছয়ার খুলিতে লাগিল। চোরের মত সন্তর্পণে উমাপ্রসাদ প্রবেশ করিল। ছয়ার বন্ধ করিয়া খিল দিল।

উমা-প্রসাদ দয়াময়ীর বিছানায় আসিয়া বসিল। সে দিন উষাকালের ঘটনার পর এই স্ত্রীর সহিত তাহার প্রথম নিভৃত সাক্ষাৎ।

দয়াময়ী জাগিয়া ছিল, স্বামীকে দেখিয়া উঠিয়া বসিল।

উমা-প্রসাদ বলিল—“দয়া, একি হল?”

আঃ—আজ তিন দিনের পর দয়া স্বামীর মুখে একটি স্নেহমাধা কথা শুনিল। এ তিন দিন কাল ভক্তগণের মা মা শব্দে তাহার হৃদয়-দেশ মরুভূমির মত শুষ্ক হইয়া পড়িয়াছিল। স্বামীর মুখনিঃসৃত এই আদরের বাণী তাহার প্রাণে বেন অকস্মাৎ সুধাবৃষ্টি করিয়া দিল। দয়া স্বামীর বৃকে মুখ লুকাইল।

উমা-প্রসাদ স্ত্রীর গায়ের শাল মোচন করিয়া তাহাকে বক্ষে চাপিয়া ধরিল। উচ্ছ্বসিত স্বরে বারংবার বলিতে লাগিল—“দয়া—দয়া একি হল—একি হল?”

দয়া নির্ঝাক।

উমা-প্রসাদও কিয়ৎক্ষণ নীরব রহিল। তার পরে বলিল—“দয়া, তোমার কি মনে হয় যে এ কথা সত্যি? তুমি আমার দয়া নও, তুমি দেবী?”

এই বার দয়া কথা কহিল—বলিল—“না, আমি তোমার স্ত্রী ছাড়া আর কিছু নই, আমি তোমার দয়া ছাড়া আর কিছু নই,—আমি দেবী নই—আমি কালী নই।”

এই কথা শুনিয়া উমা-প্রসাদ সাগ্রহে স্ত্রীর মুখচুম্বন করিল। বলিল—“দয়া, তবে চল, আমরা এখান থেকে পালিয়ে যাই। এমন কোনও দূরদেশে গিয়ে থাকব, যেখানে কেউ আর আমাদের সন্ধান পাবে না।”

দয়াল বলিল—“তাই চল। কিন্তু কি উপায়ে যাবে?”

উমাপ্রসাদ বলিল—“সে সমস্ত আমি ঠিক করব, কিছু সময় যাবে।”

দয়াল বলিল—“কবে? কবে? শীগ্গির কর—নইলে বেশী দিন আমি বাঁচব না। আমার প্রাণ ওষ্ঠাগত হয়েছে। যদি মৃত্যুও না হয়, তবে আমি পাগল হয়ে যাব।”

উমাপ্রসাদ বলিল—“না দয়াল—তুমি কিছু ভেবো না। দিন সাত তুমি ধৈর্য ধরে থাক। আজ শনিবার। আগামী শনিবার রাত্রে তোমার কাছে আসব আবার—তোমাকে নিয়ে গৃহত্যাগ করব। এই সাত দিন তুমি আশায় বুক বেঁধে কাটিয়ে দাও, লক্ষ্মী আমার, সোণা আমার।”

দয়াল বলিল—“আচ্ছা।”

উমাপ্রসাদ বলিল—“এখন তবে যাই, কেউ আবার এসে টেসে না পড়ে।”—বলিয়া সে পত্নীকে গাঢ় আলিঙ্গন করিয়া বিদায় লইল।

পরদিন প্রভাতে, দয়াময়ীর পূজা যখন প্রায় শেষ হইয়া আসিয়াছে, তখন গ্রামের এক জন অনীতিবর্ষ-বয়স্ক বৃদ্ধ লাঠিতে ভর করিয়া আসিয়া উপস্থিত হইলেন। তাঁহার কোটরাস্তর্গত চক্ষু দিয়া দর দর ধারায় অশ্রু প্রবাহিত হইতেছে। আসিয়াই, দয়াময়ীকে দেখিয়া গলবদ্ধ হইয়া তাহার সম্মুখে জাহ্নু পাতিয়া বসিয়া বুক করে বলিতে লাগিলেন—“মা, আমি চিরকাল তোমার পূজা করে এসেছি। আজ আমার বড় বিপদ মা। আজ ভক্তকে রক্ষা কর।”

দয়াময়ী বৃদ্ধের মুখের পানে কাল্ কাল্ করিয়া চাহিয়া রহিল। পুরোহিত বলিলেন—“কেন দাদা, তোমার কি বিপদ হয়েছে?”

বৃদ্ধ বলিলেন—“আমার নাতিটি কয়েক দিন জ্বর বিকারে ভুগছিল। আজ সকালে কবরেজ জবাব দিয়ে গেছে। সে না বাঁচলে আমার বংশলোপ হবে, আমার ভিটেয় সকো দেবার আর কেউ থাকবে না। তাই মার কাছে তার প্রাণ ভিক্ষা চাইতে এসেছি।”

কালীকঙ্কর চণ্ডীপাঠ করিতেছিলেন। তিনি বৃদ্ধের হৃৎথে নিরতিশয় হৃৎখিত হইয়া দয়াময়ীর মুখের পানে চাহিয়া বলিলেন—“মা গো,

বুড়োর নাতিটিকে বাঁচিয়ে দিতে হবে মা।”—বলিয়া তিনি বৃদ্ধকে বলিলেন—“দাদা,* তোমার নাতিকে এনে মার পায়ের কাছে ফেলে রাখ, যমের বাবার সাধ্য হবে না এখান থেকে নিয়ে যেতে।”

এ কথা শুনিয়া বৃদ্ধ মহা আশ্চর্য হইলেন। যষ্টিতে ভর দিয়া গৃহাভিমুখে ছুটিলেন।

এক দণ্ড কাল পরে বিধবা পুত্রবধূর কোলে নাতিটির সহিত বৃদ্ধ ফিরিয়া আসিলেন। দয়াময়ীর পদতলে বিছানা করিয়া মৃতকল্প শিশুটিকে রাখা হইল। কেবল মাঝে মাঝে চরণামৃতের পাত্র হইতে কুণ্ডি করিয়া একটু একটু চরণামৃত লইয়া পুরোহিত তাহার মুখে দিতে লাগিলেন।

শিশুর মাঠা বিধবা সুবতী দয়াময়ীর সগী। তাহার ব্যথাকাতর মুখ দেখিয়া দয়াময়ীর হৃদয় ব্যথিত হইল। শিশুটির পানে চাহিয়া দয়াময়ীর চক্ষে অশ্রু ভরিল। একান্ত মনে দেবতাকে প্রার্থনা করিতে লাগিল, “হে ঠাকুর, আমি দেবতা হই, কালী হই, মানুষ হই, যেই হই— এই ছেলোটিকে বাঁচিয়ে দাও ঠাকুর।”

দয়াময়ীর চক্ষে অশ্রু দেখিয়া সকলে বলিয়া উঠিল—“জয় মা কালী, জয় মা দয়াময়ী, মায়ের দয়া হয়েছে—মায়ের চোখে জল।”

কালীকঙ্কর দিগুণ ভক্তির সহিত চণ্ডীপাঠ করিতে লাগিলেন।

বেলা যত বাড়িতে লাগিল, শিশুটির অবস্থা উত্তরোত্তর ততই ভাল হইতে লাগিল। সন্ধ্যার পূর্বে সকলে মত প্রকাশ করিলেন আর শিশুর জীবনের কোনও আশঙ্কা নাই, স্বচ্ছন্দে বাড়ী পাঠাইয়া দেওয়া যাইতে পারে।

দয়াময়ীর দেবীত্ব আবিষ্কারের সংবাদ যত না শীঘ্র চৌদিকে ব্যাপ্ত হইয়াছিল, তাহার রূপায় মুমূর্ষু শিশুর প্রাণরক্ষার সংবাদ অধিক সস্তর প্রচারিত হইয়া পড়িল। পর দিন প্রাতেই অপর এক জন আসিয়া দয়াময়ীর চরণে নিবেদন জানাইল যে, তাহার কন্যাটি আজ তিন দিন হইতে প্রসব যন্ত্রণায় অস্থির,—মেয়ে বুঝি বাঁচে না। কালীকঙ্কর বলিলেন—“তার জন্মে আর চিন্তা কি? মার চরণামৃত নিয়ে গিয়ে মেয়েকে পান করিয়ে দাওগে। এখন আরাম হবে।”

সে ব্যক্তি গলদশ্লোচনে দয়াময়ীর চরণামৃতের পাত্রটি মাথায় বহন করিয়া লইয়া গেল। বেলা এক প্রহর অতীত হইবার পূর্বেই সন্ধ্যা আসিল মেয়েটি চরণামৃত পান করিবার অব্যবহিত পরেই নিরাপদে রাজপুত্রের মত সুন্দর সুলক্ষণসম্পন্ন পুত্রসন্তান প্রসব করিয়াছে।

আজ শনিবার। আজ উমাপ্রসাদ স্ত্রীকে লইয়া গোপনে পলায়ন করিবে। সে সমস্ত আয়োজন করিয়াছে। অর্থ সংগ্রহ করিয়াছে। মুরশিদাবাদ কিম্বা রাজমহল কিম্বা বর্ধমান এরূপ কোনও নিকটবর্তী প্রসিদ্ধ স্থানে সে যাইবে না;—যাইলে ধরা পড়িবার সম্ভাবনা। নৌকাপথে পশ্চিম যাইলে অনেক দূর যাইবে;—কোথায়, এখনও তাহার কিছু স্থিরতা নাই। হয় ভাগলপুর, নয় মুর্শের। সেখানে চাকরির চেষ্টা করিবে। পথ-থরচের মত অর্থ তাহার নিকট আছে। তাহার স্ত্রীর গায়ে যাহা অলঙ্কার আছে, তাহা বিক্রয় করিলে কোন না দুই বৎসর উভয়ের গ্রাসাচ্ছাদন চলিতে পারিবে! দুই বৎসরেও কি তাহার একটা চাকরি জুটিবে না? নিশ্চয় জুটিবে। চেষ্টার অসাধা কিছু আছে না কি?

এইরূপ নানা চিন্তায় উমাপ্রসাদ দিবাভাগ অতিবাহিত করিল। ক্রমে সন্ধ্যা হইল। আজ সে দয়াময়ীর আরতি দেখিবে। এক দিনও ত দেখে নাই। যখন শঙ্খ বণ্টার ধ্বনিতে চণ্ডীমণ্ডপ ফাটিয়া যায়, পূজা আরম্ভ হয়, তখন উমাপ্রসাদ বাড়ী ছাড়িয়া গ্রামের বাহিরে পলায়ন করে। আজ দয়াময়ীর শেষ আরতি, আজ সে দেখিবে। দেখিবে আর মনে মনে হাসিবে। কলা প্রভাতে পুরোহিত ঠাকুর যখন সর্বাঙ্গে আসিয়া দেখিবেন যে দেবী অন্তর্দ্বান করিয়াছেন, তখন তাঁহার কিরূপ অবস্থা হইবে, তাহাই উমাপ্রসাদ কল্পনা করিতে লাগিল।

রাত্রি দ্বিপ্রহর সমাগত। গৃহস্থ সকলে নিদ্রাগত। চোরের মত উমাপ্রসাদ শয্যা ত্যাগ করিল। অন্ধকারে ধীরপদে পূজার ঘরের দিকে অগ্রসর হইল। ধীরে ধীরে দ্বার মোচন করিয়া ভিতরে প্রবেশ করিল। কোণে সেইরূপ স্বতদীপ মিটি মিটি করিয়া জ্বলিতেছে। দয়াময়ীর শয্যায় উমাপ্রসাদ গিয়া বসিল। দয়াময়ী নিদ্রামগ্ন।

প্রথমে উমাপ্রসাদ সনেহে দয়াময়ীর মুখচুম্বন করিল। পরে গাঠেলিয়া তাহাকে জাগাইল। নিদ্রাভঙ্গে দয়াময়ী ধড়মড় করিয়া বিছানায় উঠিয়া বসিল।

উমাপ্রসাদ বলিল—“দয়া—এত ঘুম ? ওঠ, চল।”

দয়া বিস্মিতের মত বলিল—“কোথায় ?”

“কোথায় ?—বাবার সময় তুমি জিজ্ঞাসা করছ, কোথায়—চল, আজ রাত্রে নৌকো করে আমরা পশ্চিমে চলে যাই।”

দয়া কিয়ৎক্ষণ নীরবে চিন্তা করিল।

উমাপ্রসাদ বলিল—“ওঠ—ওঠ ; পথে গিয়ে ভেবে এখন। সব ঠিকঠাক করে রেখেছি। চল চল।”

এই কথা বলিয়া উমাপ্রসাদ স্ত্রীর হস্তধারণ করিল।

দয়া সহসা হাত ছাড়াইয়া লইয়া বলিল—“তুমি আর স্ত্রীভাবে আমাকে স্পর্শ কোরো না। আমি যে দেবী নই, আমি যে তোমার স্ত্রী, তা আর আমি নিশ্চয় করে বলতে পারিনে।”

কথাটা শুনিয়া উমাপ্রসাদ হাসিয়া উঠিল। স্ত্রীর গলা ধরিয়া তাহাকে চুম্বন করিতে বাইতেছিল। কিন্তু দয়াময়ী সহসা তাহার নিকট হইতে অপসৃত হইয়া দূরে বসিল। বলিল—“না না, হয়ত তোমার অকল্যাণ হবে।”

এ কথায় উমাপ্রসাদ যেন বজ্রাহত হইল। বলিল—“দয়া, তুমিও পাগল হলে ?”

দয়া বলিল—“তবে এত লোকের রোগ আরাম হল কেন ? তা হলে কি দেশসুদ্ধ লোক পাগল ?”

উমাপ্রসাদ অনেক করিয়া বুঝাইল। অনেক অনুন্নয় করিল। অনেক কাঁদিল।

দয়াময়ীর মুখে কেবল সেই কথা—“না না, তোমার অকল্যাণ হবে। হয়ত আমি তোমার স্ত্রী নই, হয়ত আমি দেবী।”

শেষকালে উমাপ্রসাদ বলিল—“তুমি দেবী হলে এমন পাষণী হতে না। এততেও তোমার মন অচল অটল রইল ?”

দয়াময়ী এবার কাঁদিতে কাঁদিতে বলিল—“ওগো, তুমি আমাকে বুঝতে পারলে না।”

উমাপ্রসাদ দয়াময়ীর শয্যা ত্যাগ করিয়া কিয়ৎক্ষণ স্নিগ্ধের মত সেই কক্ষে অস্থিরভাবে পদচারণা করিয়া বেড়াইল। পরে হঠাৎ দয়াময়ীর কাছে আসিয়া বলিল—“দয়া, আমার সঙ্গে তোমার বিবাহ হয়েছিল?”

দয়া বলিল—“তা হয়েছিল বৈ কি!”

“তুমি যদি দেবী, তুমি যদি কালী, আমি ত তা হলে মহাদেব, নইলে তোমার সঙ্গে আমার বিবাহ হল কি করে?”

এ কথার দয়া কি উত্তর দিবে? সে চুপ করিয়া রহিল।

উমাপ্রসাদ আবার আরম্ভ করিল—“তুমি যদি আত্মশক্তি ভগবতী হও—তবে নরলোকে কার সাধ্য যে তোমাকে বিবাহ করে? আমি যে তোমাকে বিবাহ করেছি, এত দিন যে আমি তোমার স্বামীর আসনে অধিষ্ঠিত রয়েছি, এতেই ত বোঝা যাচ্ছে যে আমিও মানুষ নই—আমিও দেবতা, আমি স্বয়ং মহেশ্বর!”

দয়াময়ী বলিল—“যদি তাই হয়, তবে আমি তোমার স্ত্রী। দেবী হই, মানুষ হই, আমি তোমার স্ত্রী।”

এ কথা শুনিয়া উমাপ্রসাদ যেন হাতে স্বর্গ পাইল। স্ত্রীকে বক্ষে চাপিয়া ধরিল। বলিল—“চল, তবে আমরা যাই। এখানে যত দিন থাকব, তত দিন তোমায় আমার বিচ্ছেদ থাকবে।”

দয়াময়ী বলিল—“তবে চল।”

খানিকটা হাঁটিয়া গঙ্গার ধারে পৌঁছিয়া নৌকা চড়িতে হইবে। কিন্তু কিছু দূর চলিয়া দয়া সহসা পামিয়া আবার বলিল, “আমি যাব না।” এবার স্বর অত্যন্ত দৃঢ়।

উমাপ্রসাদ আবার অল্পনয়ের সাধ্যসাধনার পালা আরম্ভ করিল। কিছুতেই কিছু কলোদয় হইল না।

দয়া বলিল—“আমি যদি দেবী, তুমি আমার স্বামী মহেশ্বর, তবে দুজনেই এখানে থাকি, দুজনেই পূজা গ্রহণ করি, পালাব কেন? এত জনের ভক্তিতে আনাত দেব কেন? আমি পালাব না, চল ফিরিয়ে যাই।”

উমাপ্রসাদ মর্দাহত হইয়া বলিল—“তুমি একা ফিরে যাও, আমি যাব না।”

তাহাই হইল। দয়া একা দেবীষে ফিরিয়া গেল। উমাপ্রসাদ সেই নিশীথ-অন্ধকারে মিলাইয়া গেল। পরদিন তাহার আর কোন উদ্দেশ পাওয়া গেল না।

দয়াময়ীর দেবীষে সকলেই বিশ্বাসবান, কেবল বিশ্বাস করে নাট তাহাদের বড়বধু হরসুন্দরী—খোকার মা। প্রথম দুই চারি দিন তাই বড়বধুই দয়াময়ীর জুড়াবার ঠাই হইয়াছিলেন। প্রথমে যখন স্বয়ং দয়াময়ীই বিশ্বাস করিতে চাহে নাট যে, সে দেবী, তখন সে একদিন বড়বধুর কাছে গিয়া কাঁদিয়া পড়িয়াছিল—“দিদি, আমার এ কি হল?” তিনি বলিয়াছিলেন—“কি করবো বোন, ঠাকুর পাগল হয়ে গিয়েছেন। বুড়ো বয়সে ওনার ভীমরতি ধরেছে।”

উমাপ্রসাদের নিরুদ্দেশের পর দুই সপ্তাহ গেল। তৃতীয় সপ্তাহে খোকার জ্বর হইল। দিন দিন ছেলে শুকাইয়া যাইতে লাগিল।

বৈথ আসিল, কিন্তু কালীকিঙ্কর তাহাকে চিকিৎসা করিতে দিলেন না। বলিলেন—“আমার বাড়ীতে স্বয়ং মার অধিষ্ঠান, কত কত দুঃসাধা রোগ মার চরণামৃত পান করে ভাল হয়ে গেল, আর আমার বাড়ীতে রোগ হলে বৈথ এসে চিকিৎসা করবে?”

বড়বধু নিজ স্বামী তারাপ্রসাদের কাছে কাঁদিয়া পড়িলেন—“ওগো, ছেলেকে বাদি দেখাও গো, নইলে আমার ছেলে বাঁচবে না। ও রাঙ্কুসি ডাইনি আমার ছেলেকে বাঁচাতে পারবে না। ওর কি সাধি!”

তারাপ্রসাদ অত্যন্ত পিতৃভক্ত। পিতার বিশ্বাস, পিতার বিধান, এ সমস্ত তিনি বেদের মত মান্ত করেন। তিনি স্ত্রীকে বলিলেন—“খবরদার, ও কথা বোলো না, ছেলের অকলাণ হবে। মা যা করবেন তাই হবে।”

কিন্তু বড়বধুর প্রতিদিনকার কাকূতি মিনতি ও ক্রন্দনে কর্তা এক দিন গলবস্ত্র হইয়া দয়াকে জিজ্ঞাসা করিলেন—“মা, খোকার যে ব্যারাম হয়েছে, তাতে বৈথ দেখাবার কোনও প্রয়োজন আছে কি?”

দয়াময়ী বলিল—“না, আমিই ওকে ভাল করে দেব।”

কালীকঙ্কর নিশ্চিত হইলেন। তারাপ্রসাদও নিশ্চিত হইলেন।

থোকার মা এক দিন একটি বিশ্বস্ত বিকে কবিরাজের কাছে পাঠাইয়া দিলেন—যাহা কিছু রোগের বিবরণ সব বলিয়া দিলেন। ঔষধ চাই।

কবিরাজ মহাশয় এ প্রস্তাব শুনিয়া দন্তে জিহ্বা দংশন করিয়া বলিলেন—“মাঠাকুরুণকে বলিস, যখন স্বয়ং শক্তি বলেছেন তিনিই থোকাকে আরোগ্য করে দেবেন, তখন আমি ওষুধের ব্যবস্থা করে অপরাধী হতে পারব না।”

যাহার সঙ্গে দেখা হয়, তাহাকেই থোকার মা কাঁদিয়া বলেন—“ওগো, কিছু ওষুদ বলে দাও, আমার ছেলে বাঁচে না।”

সকলেই বলে—“ওমা, ও কথা বোলো না, তোমার ভাবনা কি? তোমার ঘরে স্বয়ং আত্মশক্তি বিরাজ করছেন।”

থোকার ব্যারাম ক্রমেই বাড়িয়া উঠিল। দয়া বলিল—“থোকাকে এনে আমার কোলে দাও।”

থোকাকে কোলে করিয়া দয়া সমস্ত দিন বসিয়া রহিল। থোকা অনেকটা ভাল রহিল। কিন্তু রাত্রে আবার থোকার ব্যারাম বৃদ্ধি হইল।

দয়াময়ী একান্ত মনে, একান্ত প্রাণে কত করিয়া থোকাকে আশীর্বাদ করিল, থোকার গায়ে হাত বুলাইল।

কিন্তু কিছুতেই থোকা বাঁচিল না!

যখন থোকার নৃত্যসংবাদ বাড়ীতে প্রচারিত হইল তখন তারাপ্রসাদ অধীর হইয়া ছুটিয়া আসিল—দয়াময়ীকে বলিল—“ব্রাহ্মসি, থোকাকে নিলি? কিছুতেই মায়াত্যাগ করতে পারলিনে?”

থোকার মা প্রথমে শোকে অত্যন্ত বিহ্বল হইল। যখন কতকটা সুস্থ হইল তখন দয়াময়ীকে বা মুখে আসিল তাই বলিয়া গালি দিল। বলিল—“ও দেবী কোথায়? ও ডাইনি। দেবী কখনও ছেলে খায়?”

কালীকঙ্কর ছল ছল নেত্রে দয়ার পানে চাহিয়া বলিলেন—“মা, থোকাকে ফিরিয়ে দে। এখনও দেহ নষ্ট হয় নি। ফিরিয়ে দে মা, ফিরিয়ে দে।”

দয়াময়ী বর বর করিয়া কাঁদিতে লাগিল। মনে মনে বমরাজাকে

উদ্দেশ্য করিয়া আঞ্জা করিল, 'এখন খোকার আত্মা খোকার শরীরে ফিরাইয়া দেওয়া হউক।'

তাহাতে যখন হইল না, তখন মিনতি করিল।

আদ্যাশক্তির মিনতিতেও যমরাজা খোকার প্রাণ ফিরাইয়া দিলেন না।

তখন নিজের দেবীত্বে দয়ার অবিশ্বাস জন্মিল।

আজ তাহার পূজা ইত্যাদি প্রায় বন্ধ বলিলেই হয়। সমস্ত দিন কেহ তাহার কাছে আসিল না। দয়া একাকিনী বসিয়া সারাদিন চিন্তা করিল।

সন্ধ্যা হইল। আরতির সময় উপস্থিত। যেমন তেমন করিয়া আরতি হইল।

পরদিন কালীকৃষ্ণর উঠিয়া পূজার ঘরে গিয়া দেখিলেন, সন্ধ্যানাশ!—
পরিধেয় বস্ত্র রঞ্জুর মত করিয়া পাকাইয়া, কড়িকাঠে লাগাইয়া দেবী
আত্মহত্যা করিয়াছে।